

嘉業堂
叢書

金石錄

第四冊



金石錄卷之十二

跋尾二 三代

古器物銘第八

父丙彝銘

秦漢 宋君夫人鼎銘

古器物銘第九

敦銘

宋穆公孫盤銘

散季敦銘

古器物銘第十

井伯敦銘

古器物銘第十一

鼎銘

古器物銘第十二

楚鐘銘

中姑匱銘

車敦銘

古器物銘第十三

齊侯盤銘

古器物銘第十四

秦權銘

汾陰侯鼎銘

銅釜銘

武安侯器銘

周陽家鐘銘

上林供官銅鼎銘

平周金銅鉦銘

古器物銘第十五

谷口銅甬銘

律管銘

古器物銘第八

父丙彝銘

右父丙彝銘舊藏祖擇之舍人家後歸故人王偁唯蓋存已破缺此周器也而猶稱父丙者當是周初接商時器

宋君夫人鼎銘

右宋君夫人鼎銘其文云宋君夫人之餽釵鼎呂氏考古圖云藏秘閣今乃在宗室仲爰家而秘閣所藏自有

宋公緜鼎蓋考古之誤也

古器物銘第九

敦銘

右敦銘藏宗室仲爰家銘文凡二百餘字余所錄諸器銘文字之多無踰此者

宋穆公孫盤銘

右宋穆公孫盤銘元祐閒臨淄縣民於齊故城得數器此其一也藏趙元考內翰家驗其文蓋送女器

散季敦銘

右散季敦銘藏長安呂微仲丞相家底蓋皆有銘考古圖以太初麻推之爲武王時器未知是否又云武王時散氏唯有宜生季疑其字者亦何所據哉士大夫於考正前代遺事其失常在於好奇故使學者難信孔子曰君子於其所不知蓋闕如也

古器物銘第十

井伯敦銘

右井伯敦銘云惟六月旣生霸戊戌旦王格于大室師某父卽位井伯右內史冊命錫赤芾對揚王休用作寶

敦其萬年子子孫孫其永寶用古器銘文字難盡通故
時有斷續不可次第處今此銘四十餘字所不識者唯
一字而已因并載其語按左氏春秋傳有井伯然古人
姓名或有同者未可知也

師下一字
不可識

古器物銘第十一

鼎銘

右鼎銘藏蜀人鄧氏銘有云王格大室卽立按古器物
銘凡言卽立或言立中庭皆當讀爲位蓋古字假借其
說見鄭氏注儀禮秦泰山頌詩刻石猶如此

古器物銘第十二

楚鐘銘

右楚鐘銘藏方城范氏云惟王五十六祀楚王

下一字不可識

章按楚惟惠王在位五十七年又其名爲章然則此鐘爲惠王作無疑也方是時王室衰弱六國爭雄楚尤强大遂不用周之正朔嗚呼可謂僭矣鐘背又有兩商字一穆字其義未曉

中姑匱銘

右中姑匱銘與後兩器皆藏李伯時家初伯時得古方

鼎遂以爲晉侯賜子產者後得此匜又以爲晉襄公母
偁姑器殊可笑凡三代以前諸器物出於今者皆可寶
何必區區附託書傳所載姓名然後爲奇乎此好古者
之蔽也

車敦銘

右敦銘其文云作旅車敦莫詳其義

古器物銘第十三

齊侯盤銘

右齊侯盤銘政和丙申歲安邱縣民發地得二器其一

此盤其一匝也驗其文蓋齊侯爲楚女作

古器物銘第十四

秦漢

秦權銘

右秦權銘今世人家所藏秦權至多銘文悉同余所得者凡四銘其二不知所從得其一藏王禹丞相家皆銅權也其一近歲出於濟州以石爲之歐陽文忠公集古錄載秘閣校理文同家有二銘其一乃銅鑲上有銘循環刻之不知爲何器余嘗考之亦權也按班固漢書律志五權之制圜而環之令之肉倍好者周旋無端

周而復始無窮已也孟康注以謂錘之形如環也然古權亦有與今稱錘相似者蓋形製不一各從其便爾

汾陰侯鼎銘

右汾陰侯鼎銘舊藏劉原父家今歸

御府按漢書周昌以高祖六年封汾陰侯至其孫國除

銅釜銘

右銅釜銘云長信賜館陶家按漢書外戚傳竇皇后女嫖封館陶長公主又百官公卿表長信詹事掌皇太后宮景帝中六年更名長信少府張晏注曰以太后所居

宮爲名也居長信則曰長信少府居長樂則曰長樂少府然則景帝時官名長信則竇太后居是宮無疑銘雖無年月然知其爲竇太后賜館陶公主亦無疑也

武安侯器銘

右武安侯家器銘不知所從得按漢書景帝後三年封田蚡武安侯又楚思王子愷元壽元始中再封武安侯銘無年月未知果誰所作又按帝紀楚懷王嘗封高祖爲武安侯然驗其刻畫疑非高祖時器

周陽家鐘銘

右鐘銘藏歐陽公家其器壺也銘云岷邑家令周陽家金鐘容十斗重三十八斤第四十云

上林供官銅鼎銘

右上林供官銅鼎銘不知所從得銘有監工李負芻按後漢人絕無二名者此鼎蓋西漢器也

平周金銅鉦銘

右銅鉦銘云平周金銅正重十六斤八兩背文云平定五年受園陰士大夫頗疑前代年號無爲平定者余嘗考之蓋非年號也按西漢書地里志平周平定園陰三

縣皆屬西河郡圜陰漢惠帝五年置此鉦先藏平周後歸圜陰後以授平定故再刻銘爾所謂五年者當是景帝以前未有年號時也前世既無平定年號而三縣皆隸西河故知其如此又漢書地理志圜陰王莽改曰方陰顏師古云圜字本作囿縣在囿水之陰因以爲名王莽改爲方陰則是當時已誤爲圜今有銀州銀水卽是舊名猶存但字變耳其說出於酈道元注水經今按茲器漢時所刻乃爲圜字然則師古何所依據遂以爲囿乎悲亦臆說也

古器物銘第十五

谷口銅甬銘

右谷口銅甬銘舊藏劉原父家一器而再刻銘始歐陽公集古錄金石遺文自三代以來法書皆備獨無西漢文字求之累年不獲會原父守長安長安故都多古物奇器原父好奇博識皆購求藏去最後得斯器及行鐙博山香鼎模其銘文以遺歐陽公於是西漢之書始傳於世矣蓋收藏古物實始於原父而集錄前代遺文亦自文忠公發之後來學者稍稍知搜抉奇古皆二公之

力也

律管銘

右律管銘藏晁無咎學士家云始建國元年正月癸酉朔日制按晉書律麻志律古以竹或玉爲之至平帝時王莽始易以銅又漢書莽以十二月朔癸酉爲建國元年正月之朔二說皆合也

金石錄卷之十二

金石錄卷之十三

跋尾三
秦漢三代

安州所獻六器銘

齊鐘銘

家藏古器物銘上

父乙彝銘
爵銘
戟銘

家藏古器物銘下

孟姜盟匱銘
漢廩正宮鎗銘
旧鼎銘

石本古器物銘

吉日癸巳字

石鼓文

秦詛楚文

玉璽文

秦泰山刻石

秦琅邪臺刻石

秦之罘山刻石

秦嶧山刻石

安州所獻六器銘

右六器銘重和戊戌歲安州孝感縣民耕地得之自言
於州州以獻諸

朝凡方鼎三圓鼎二甗一皆形製精妙款識奇古按此